

Christi, eandem imputat, & eam imputando, peccata remittit. Propter hanc arctissimam conjunctionem una pro altera ponitur Rom. 4. 6. 7. & 12. Imo & justificatio in sola etiam peccatorum remissione constituitur Psal. 32. 1. Rom. 4. 7.

V. *Iustitia meriti Christi includit iustitiam personæ.* Iustitia personæ est non tantum activa Christi obedientia, quam ille præstitit legi, sed complectitur totius personæ θεανθρωπίνου iustitiam divinam & humanam, hoc est, essentialem Deitatis, & formalem atque actualem humanitatis sanctitatem, seu conformitatem cum lege. Iustitia meriti non est tantum sanguis & mors Christi, sed complectitur totam obedientiam humiliationis ab articulo conceptionis usque ad mortem crucis. Hæc iustitia includit & præsupponit iustitiam personæ. Oportebat enim mediatorem nostrum esse Deum & hominem justum, ut iustitiam nobis mereri & conferre posset.

VI. *Ab obedientia Christi passiva ad exclusionem activæ non valet argumentum, cum agitur de causa meritoria justificationis.* Dupliciter enim illa obedientia activæ consideratur: primò ut conformitas cum lege, & sic est iustitia personæ mediatoris, adeoque non ingreditur justificationem